

# PARTANGIANGAN TAON BARU KELUARGA 2021

Pukul 00:00 WIB, Jumat, 1 Januari 2021

## I. PANGARADEON:

- Partangiangan on ni uluhon ni Ama manang Ina.
- Diaturhon ma na mamboanhon tangiang pangondianan jala dipajojor ma aha sitangianghonon.
- Diparade hian ma inganan ni pelean.

## II. PARTANGIANGAN: U = Uluan                      K = Keluarga

### 01. Marende BE No. 70:1-2, "NAUNG SALPU TAON NA BURUK I" BL. 36

- ❖ *Naung salpu taon na buruk i, Ho ma hupuji Tuhanhi.*  
*Ai diramoti Ho tongtong, tondingku dohot daginghonon.*  
*Ai diramoti Ho tongtong, tondingku dohot daginghonon.*
- ❖ *O Jesus, sai asi rohaM, paian deggan ni basaM.*  
*Muse di taon na'mbaru on, di nasa huriaM tongtong.*  
*Muse di taon na'mbaru on, di nasa huriaM tongtong.*

### 02. Tangiang Pamuhai:

**U** : Selamat Taon Baru ma di hita!

**K** : **Selamat Taon Baru ma tutu.**

**U** : Tapuji ma Amanta Debata, dohot AnakNa Tuhan Jesus Kristus dohot Tondi Parbadia naung mangaramoti hita mandalani Taon 2020 na salpu i jala na paloashon hita mamasuhi Taon 2021 on.

**K** : **Sai parroha i ma hami mamilangi angka ariarinami, asa dapotan roha na bisuk hami.**

**U** : Mandok mauliate ma hamu di Jahowa, ai Pardengganbasa do Ibana, ai ro di salelenglelengna do asi ni rohana i. HALELUYA!

**Martangiang ma hita:** Ale Tuhan Debata, Pardengganbasa jala Parasiroha, mauliate ma di deggan ni basaM dohot di pangaramotionMu saleleng di taon 2020 na salpu i. Godang do hahurangan dohot pangalaosionnami maradophon Ho nang maradophon dongannami jolma. Marpamuati ma rohaM di hahurangannami i ale Debata. Asi ma rohaM di hami. Mauliate ma Tuhan ala di loas Ho hami mamasuhi taon na imbaru 2021 on. On pe, TondiMi ma na mandongani hami, asa tarbahen hami mandalani taon 2021 on. Ho ma manjoloani langkanami asa Ho huihuthon hami. Mangasahon Goar ni AnakMu Tuhan Jesus Kristus, jalo ma tangiang dohot pujipujiannami on. AMEN.

### 03. Marende BE No. 64:1-2, "NAUNG MORU DO MUSE SATAON" BL. 192

- ❖ *Naung moru do muse sataon, huhut lam suda bohalhi.*  
*Beha do ahu nasailaon, ture do pangalahongki?*  
*Lam ganda haporseaonhu, nang holong ni rohangku pe;*  
*Di Jesus dohot Debatangku, nang di donganhu sasude?*

- ❖ *Aut alusanhu Debatangku, ra tung maila au disi.  
Marningot salpu ni rohangku, ro di sude ulaonhi.  
Ai dosa do binaen ni tangan, gok dosa nang rohangku pe;  
Nang pat, nang mata, nang pamangan, luhut marsala do hape.*

#### 04. MANJAJA HATA NI DEBATA:

- U** : Turpuk di hita di partangianganta ima na tarsurat di **Psalmen 124:1-8**. Aut unang Jahowa mandongani hita, sai i ma didok Israel.
- K** : **Aut unang Jahowa mandongani hita, uju hehe jolma mangalo hita:**
- U** : Sai ngolungolu hita bondutonna, uju i di panombo ni rimasnasida dompak hita.
- K** : **Sai na aupon ni angka aek do hita uju i, sai na boluson ni batang aek i do tondinta.**
- U** : Sai na boluson ni angka aek na marhasahi do tongon tondinta uju i.
- K** : **Pinuji ma Jahowa, na so mangalehon hita sisoroon ni angka nginginasida i.**
- U** : Nunga malua tondinta i songon pidong, na malua sian sambil ni parsambil, nunga matos sambil i, jadi malua hita.
- K** : **Ianggo pangurupion di hita di bagasan goar ni Jahowa, Sitompa langit dohot tano on do.**
- U** : I ma sahatna. Martua ma angka na tumangihon Hata ni Debata jala na umpeosa. Amen.

#### 05. Marende BE No. 68:1+5, "MASILELEAN ANGKA TAON" BL. 93

- ❖ *Masilelean angka taon ro di ujungna sogot.  
O Jesus lehon parrohaon na naeng tongtong marningot.  
Di halalao ni aringki Huhut manimbang ujung ni.*
- ❖ *O Jesus sai urupi au, di taon na ro mamboan.  
Parbue angka na sai tau padaohon hamagoan.  
Sai pargogoi ma au tongtong pasangap Ho di ngolungkon.*

#### 06. Renungan :

##### **"JAHOWA MANGULUHON DOHOT MANGIRINGIRING" Jesaya 52:11-12**

Marragam do na masa na taadopi saleleng taon 2020. Adong na tonggi adong muse do na paet na mambahen hita marlas ni roha manang marsak. Sada na so tarhalupahon di parjalanan taon 2020 ima sorimoga Covid-19 na so pola binoto andigan do marhaujungan on. Ndada holan di Indonesia i masa alai tung di sandok portibi on na mambahen godang marmatean, marsikola pe ingkon sian jabu do, marminggu pe ingkon jaga jarak. Suang songoni nang tu parngoluan ekonomi na mambahen godang perusahaan gabe tutup, godang ma na di paharuar, godang na pengangguran dohot godang ni ragam na masa na so hagoaran hita alani deakna. Molo dipaloas Debata hita manalpuhon sudena i aha do na boi taparsiajari marhite angka na masa i? Molo taadopi na tonggi tadok do mauliate tu Debata? Manang molo taadopi na paet tong do hita mandok mauliate manang lam ta padao do sian Tuhan i?

Nuaeng nunga masuk hita tu sada taon na imbaru ima taon 2021. Nandang taboto dope aha na masa na naeng siadopanta. Alani sorimago Covid-19 na masa di sandok portibi on, nunga masuk be hita tu sada budaya na imbaru na so taduga hian masa i. Ingkon mamake masker, cuci tangan, jaga jarak, asa boi hita mangotapi virus on. Tagamon dope nuaeng mulak tu hasomalanta na leleng? Nandang adong na boi manjamin i. Alani hita na ma na ingkon malo mamereng na masa. Asa nangepe songon i na masa alai boi hita mangolu dohot mangalului parngoluan. Na asing muse ingkon adopanta do isara ni masalah ekonomi, parkarejoan, parsikolaan, dohot ragam na asing. Boha muse dohot keluarganta? Tolapta do mangadopi taon 2021 on?

Toho di bona ni taon on didok Hata ni Debata do tu hita na tarsurat di Jesaya 52:12, *"Ruar, ruar, borhat ma hamu sian i, unang jama hamu na ramun! Ruar ma hamu sian tongatonganasida! Manguras ma hamu, ale angka na mangusung ulaula ni Jahowa. Ai ndang pola humalapot hamu laho ruar, manang marlojong songon halak na maporus, ai Jahowa do manguluhon hamu, jala Debata ni Israel mangiringiring hamu sian pudi."* Hata ni Debata on tu halak Israel na tarbuang di Babel di hamumulak nasida tu Jerusalem. Molo na jolo nasida haruar sian Misir laho martangiang tu Debata (2 Musa 3:12, 18; 5:1) saonari nasida parade diri haruar sian Babel laho masuk tu partangiang na imbaru. Di suru do nasida haruar, borhat, unang manjama na rumar (bnd. 40:1; 51:9, 17; 52:1). Molo haruar nasida, nunga masuk be nasida tu sada partangiang na imbaru: mardalan huhut mangusung ulaula ni Jahowa. Asa manang ise na dohot di partangiang i ndang boi nasida dais tu na ramun jala ingkon manguras (paia diri) – padaohon diri sian na boi mangambat nasida gabe bangso ni Debata. Borhat ma mandalani ngolu na imbaru ai Debata do na manguluhon jala Debata do na mangiringiring.

Antong borhat ma hita tu taon 2021 on ai Debata do na manguluhon hita sian jolo jala Debata do na mangiringiring hita sian pudi. Aha pe na masa di taon 2021 ndang mambahen hita gabe sumurut. Aha pe na masa las ni roha manang arsak ni roha, porsea ma di Debata asa Ibana na manguluhon dohot mangiringiring. Mardalan ma hita rap dohot Tuhan Jesus asa Ibana na patiur langkanta jala TondiNa i na mangajarajari hita. Parade ma tingkim laho martangiang tu Debata manang sahalakmu manang rap dohot keluarga, mangido pangurupion dohot pandonganion ni Tuhan i. Mangalehon tingki manjaha Hata ni Debata ganup ari asa dilehon di hita roha laho mangantusi dohot parbinotoan mandalani ngolunta on, jala tongtong hita dibagasan haserepon dohot lambas ni roha mangantusi partingkian na pinasahat ni Debata tu hita dungi dohononta ma songon na tarsurat di Buku Ende No. 149:3, *Manang aha pe na masa Las ni roha arsak pe. Tioponhu Ho na basa na marholong roha pe, tung saleleng au mangolu, nang dung suda bohahon, ingkon Ho, o Sipangolu Pujionhu sai tongtong.*

Nandang mamereng tu pudi be hita jala ingkon mardalan do hita di partingkian ni Debata. Alani pangido ma hagagoon sian Tuhan Jesus asa dilehon roha na tau manimbangi na denggan di bagasan ngolunta (1 Raja 3:9). Paloas ma Hata ni Debata na mangula di bagasan ngolum asa marhasonangan ho di ngolumon. Nandang hea Debata pasombu manang maninggalhon hita (Heb. 13:5). Antong, mandok mauliate ma hita tu Debata na paloashon hita mandalani taon 2021 on. Tuhanta ma na mangaramoti hita. Amen !

**07. Marende BE No. 758:3, "JAHOWA PANGURUPI"**

- ❖ *Jahowa pandongani di na porsea i.  
Ibana patuduhon nang sidalananmi.  
Asa marolopolop ho di ujungna i.  
Ibana do donganmu nuaeng nang sogot i.*

**08. Doa Syafaat (Tangiang Pangondianon)**

*Sitangianghononhon:*

- a. Mandok mauiate tu Debata ala pangaramotionNa
- b. Keluarga, angka sisolhot na dao dohot na jonok, nang angka ulaon
- c. Huria, ruas dohot Parhalado
- d. Bangso / Negara, dohot pamarenta
- e. Dohot angka na asing

**09. Marende BE No. 474:1, "INGKON JESUS DO DONGANHU" BL. 321**

- ❖ *Ingon Jesus do donganhu, sahalakhu lilu do.  
Raphon Jesus boi au monang, talu musu i na ro.  
Ndang mabiar au disi, Tuhan Jesus donganhi.  
Sai ihuthononhu Jesus, oloanhu nama i.*

**10. MANDOK HATA: (Hombar tu pangatur ni keluarga)**

**11. Marende BE No. 66:1-2, "DEBATA BAEN DONGANMI" BL. 52**

**--- Papungu pelean sipasahaton tu huria ---**

- ❖ *Debata baen donganmi, lao mangula ulaonmu.  
Baen Ibana haposanmu, sai paserep rohami.  
Debata baen donganmi, Debata baen donganmi.*
- ❖ *Debata baen donganmi, molo Debata donganmu.  
Ndang tarbahen ho be lilu, sai ture do langkami.  
Debata baen donganmi, Debata baen donganmi.*

**12. TANGIANG PANUTUP – ALE AMANAMI – AMEN**

**13. MARSIJALANGAN**

**SELAMAT TAON BARU  
1 Januari 2021**